

Član 11**(Rokovi za obradu podataka)**

Rokovi za obradu podataka u zbirkama ličnih podataka iz člana 3 ovog pravilnika određeni su:

- a) Evidencija o videonadzoru – podaci iz ove evidencije brišu se po isteku roka od 30 dana od dana njihovog nastanka;
- b) Evidencija o pruženim asistencijama – podaci iz ove evidencije čuvaju se trajno;
- c) Evidencija o povjerenicima koji vrše neposredan nadzor nad licima kojima je izrečena krivičnopravna sankcija – rad za opšte dobro na slobodi – podaci iz ove evidencije čuvaju se trajno;
- d) Evidencija o sprovođenju u kazneno-popravni zavod – podaci iz ove evidencije čuvaju se trajno;
- e) Evidencija o licima kojima je izrečena krivičnopravna sankcija rad za opšte dobro na slobodi – podaci iz ove evidencije čuvaju se trajno;
- f) Evidencija o kandidatima upisanim na listu stalnih sudskih tumača u Brčko distriktu BiH – podaci iz ove evidencije čuvaju se trajno;
- g) Evidencija o kandidatima upisanim na listu stalnih sudskih vještaka u Brčko distriktu BiH – podaci iz ove evidencije čuvaju se trajno;
- h) Evidencija o dovođenju iz kazneno-popravnih zavoda – podaci iz ove evidencije čuvaju se trajno;
- i) Evidencija o dovođenju s adrese – podaci iz ove evidencije čuvaju se trajno;
- j) Personalna evidencija – podaci iz ove evidencije čuvaju se trajno;
- k) Evidencija o uvidu u personalni dosje zaposlenika - podaci iz ove evidencije čuvaju se trajno;
- l) Evidencija o angažovanim izvršiocima za obavljanje privremenih i povremenih poslova – podaci iz ove evidencije čuvaju se trajno;
- m) Evidencija o angažovanim volonterima – podaci iz ove evidencije čuvaju se 5 godina;
- n) Registar testamenata i drugih nasljednopravnih poslova – podaci iz ove evidencije čuvaju se trajno;
- o) Evidencija o izdatim službenim legitimacijama za sudije Apelacionog suda Brčko distrikta BiH i sudije Osnovnog suda Brčko distrikta BiH - podaci iz ove evidencije čuvaju se trajno.

Član 12**(Prenos podataka drugim kontrolorima)**

- (1) Davanje podataka sadržanih u zbirkama ličnih podataka iz člana 3 ovog pravilnika se vrši u skladu s članom 17 Zakona, ukoliko su u pitanju javni organi i ukoliko su istima ovi podaci potrebni radi izvršavanja zakonom utvrđene nadležnosti.
- (2) Davanje podataka sadržanih u zbirkama ličnih podataka iz člana 3 ovog pravilnika korisniku koji je pravno i fizičko lice, vrši se u skladu sa Zakonom o slobodi pristupa informacijama u Bosni i Hercegovini.
- (3) Davanje podataka iz evidencije o zaposlenim i evidencije o obračunu i isplata plata vrši se institucijama, ustanovama i zavodima radi regulisanja radno-pravnog statusa kao i prava i obaveza zaposlenika.

Član 13**(Odbijanje zahtjeva trećih lica)**

Lični podaci neće se davati, odnosno objavljivati trećim licima osim kada je to zasnovano na zakonu i propisano ovim pravilnikom.

Član 14**(Posebne odredbe o odgovornosti za štetu)**

- (1) Komisija kao kontrolor dužna je nadoknaditi štetu nosiocu podataka ako mu je ona nanesena zbog povrede prava na privatnost i to ako je povreda, odnosno šteta nanesena nezakonitim radom Komisije.

DIO TREĆI – OBJAVLJIVANJE LIČNIH PODATAKA**Član 15****(Objavljivanje ličnih podataka)**

- (1) Komisija će po službenoj dužnosti ili na zahtjev bilo kog fizičkog ili pravnog lica objaviti lične podatke čije je objavljivanje izričito propisano, ili čije objavljivanje proizilazi iz prirode podataka i javnosti rada institucija, saglasno ovom pravilniku.
- (2) Lični podaci objavljuju se po službenoj dužnosti samo onda kada je objavljivanje ličnih podataka izričito propisano ili objavljivanje po službenoj dužnosti proizilazi iz prirode stvari.
- (3) Ostali lični podaci koji po odredbama ovog pravilnika podliježu objavljivanju, objavit će se samo na zahtjev, po propisanom postupku.

Član 16**(Podaci o kandidatima)**

- (1) U postupku konkursa, objavljuju se samo sljedeći lični podaci:
 - a) ime i prezime kandidata, radno mjesto na koje se prijavio i neophodni kontakt za komunikaciju;
 - b) uspjeh kandidata u pojedinim fazama javnog konkursa (ocjene – bodovi).
- (2) Podaci iz stava 1 ovog člana se objavljuju tek kada se utvrdi lista kandidata, odnosno kada kandidat bude pozvan na određeni ispit (tačka a), te kada se određeni ispit okonča i utvrde rezultati istog (tačka b).
- (3) Prije nastupanja događaja iz stava 2 ovog člana, lični podaci iz stava 1 ovog člana se ne objavljuju.
- (4) Ostali lični podaci kandidata se ne objavljuju.

DIO ČETVRTI - EVIDENCIJE**Član 17****(Evidencija o zbirkama ličnih podataka)**

- (1) Komisija vodi evidenciju o svakoj zbirci ličnih podataka iz člana 3 ovog pravilnika, u skladu s članom 13 Zakona.
- (2) Evidencija iz stava 1 ovog člana sadrži osnovne informacije o svakoj zbirci ličnih podataka i vodi se na obrascu evidencije koji je propisan Pravilnikom o načinu vođenja i obrascu evidencije o zbirkama ličnih podataka.

Član 18**(Evidencija o davanju ličnih podataka korisniku)**

Komisija vodi evidenciju o ličnim podacima koji su dati korisniku ličnih podataka i svrsi za koju su dati, u skladu s članom 17 stavom 5 Zakona.

Član 19**(Službenik zadužen za vođenje evidencija)**

Evidencije iz ovog pravilnika vodi službenik koji je ovlašten da prikuplja i obrađuje lične podatke u oblasti rada Pravosudne komisije za koju se prikupljaju podaci.

DIO PETI – ZAVRŠNE ODREDBE**Član 20****(Stupanje na snagu)**

Ovaj pravilnik stupa na snagu danom donošenja, a objavit će se u Službenom glasniku Brčko distrikta BiH.

Broj: SuPK-03-2194/19

Brčko, 20. 12. 2019. godine

**PREDSJEDNIK
PRAVOSUDNE KOMISIJE**
Safet Pizović, s. r.

u pravosuđu Brčko distrikta Bosne i Hercegovine (Službeni glasnik Brčko distrikta Bosne i Hercegovine, br. 48/18 i 1/19), Pravosudna komisija na 211. redovnoj sjednici održanoj 20. 12. 2019. godine, donosi

**PRAVILNIK O IZMJENI I DOPUNI
PRAVILNIKA O STRUČNOM USAVRŠAVANJU
SLUŽBENIKA I NAMJEŠTENIKA U PRAVOSUĐU
BRČKO DISTRIKTA BiH**

Član 1

U Pravilniku o stručnom usavršavanju službenika i namještenika u pravosuđu Brčko distrikta Bosne i Hercegovine (Službeni glasnik Brčko distrikta Bosne i Hercegovine, broj 13/19), u članu 11 stavu 1 iza riječi: „novčana sredstva“ stavlja se tačka, a riječi: „i da je aktom o unutrašnjoj sistematizaciji kao poseban uslov za to radno mjesto predviđen stručni ispit“ se brišu.

Član 2

U članu 14 iza stava 2 dodaje se novi stav 3, koji glasi: „(3) Prijedlog iz stava 2 ovog člana podnosi se ukoliko:

- a) je aktom o unutrašnjoj sistematizaciji radnih mjesta kao poseban uslov za određeno radno mjesto predviđen ispit za rad u organima uprave, pravosudni ispit ili stručni ispit ili;
- b) po ocjeni rukovodioca pravosudne institucije posjedovanje pravosudnog ispita ili stručnog ispita može značajno doprinijeti uspješnom obavljanju poslova službenika odnosno namještenika.“

Stavovi od 3 do 6 postaju stavovi od 4 do 7.

Član 3

(Stupanje na snagu i primjena)

Ovaj pravilnik stupa na snagu danom donošenja, a objavit će se u Službenom glasniku Brčko distrikta Bosne i Hercegovine.

Broj: SuPK-03-2196/19
Brčko, 20.12.2019. godine

**PREDSJEDNIK
PRAVOSUDNE KOMISIJE**
Safet Pizović, s. r.

55

Pravosudna komisija Brčko distrikta BiH, na osnovu odredbe člana 14 stava 1 tačke n) Zakona o Pravosudnoj komisiji Brčko distrikta BiH (Službeni glasnik Brčko distrikta BiH, br.: 19/07, 20/07 i 02/08) i odredbe člana 7a Zakona o platama i drugim naknadama sudija i tužilaca u Brčko distriktu BiH (Službeni glasnik Brčko distrikta BiH, br.: 01/06, 21/14 i 27/19), na 211. redovnoj sjednici održanoj 20. 12. 2019. godine, donosi sljedeći

**PRAVILNIK
O USLOVIMA I NAČINU OSTVARIVANJA PRAVA NA
NAKNADU SUDIJA I TUŽILACA ZA PRIPRAVNOST,
PREKOVREMENI RAD, RAD U NERADNE DANE, NOĆNI
RAD I RAD U DANE DRŽAVNIH PRAZNIKA**

**Član 1
(Predmet)**

Ovim pravilnikom uređuju se uslovi i način ostvarivanja prava sudija i tužilaca na naknadu za pripravnost, prekovremeni rad, rad u neradne dane, noćni rad i rad u dane državnih praznika.

**Član 2
(Naknada za pripravnost)**

- (1) Kada je odlukom rukovodioca pravosudne institucije određen da bude u pripravnosti sudija i tužilac za period u kojem je bio pripravan ima pravo na dodatak na platu za pripravnost u iznosu od 4% od osnovne plate sudije, odnosno tužioca. Pripravnost sudije, odnosno tužioca se određuje na sedmičnom nivou (u trajanju od 7 dana).

- (2) Osnovna plata u smislu ovog člana jeste plata propisana Zakonom o platama i drugim naknadama sudija i tužilaca u Brčko distriktu BiH s korekcijom iz člana 5 navedenog Zakona, bez povećanja na ime dodatka na radni staž.
- (3) Kada ostvari pravo na naknadu za pripravnost, sudija i tužilac ne može za dane za koje je bio pripravan ostvariti i pravo na naknadu za prekovremeni rad, rad u neradne dane, noćni rad ili rad u dane državnih praznika.
- (4) U jednom mjesecu sudiji, odnosno tužiocu se može isplatiti samo jedna naknada za pripravnost.

Član 3

**(Naknada za prekovremeni rad, rad u neradne dane,
noćni rad i rad u dane državnih praznika)**

- (1) Prekovremeni rad, rad u neradne dane, noćni rad i rad u dane državnih praznika nadoknađuju se u slobodnim danima, tako što se sudijama i tužiocima omogućava korištenje slobodnih dana u onom broju koliko su ostvarili sati rada uvećanih za 25 % (dvadeset i pet procenata).
- (2) Slobodni dani moraju se iskoristiti u roku od 90 dana od dana kada su ostvareni prekovremeni sati.
- (3) Pravo na naknadu iz ovog člana sudije i tužiocu ostvaruju samo kada je prekovremeni rad, rad u neradne dane, noćni rad i rad u dane državnih praznika uzrokovan neodložnim i hitnim poslovima koji se inače ne mogu izvršavati u toku trajanja redovnog radnog vremena.
- (4) Nakon završetka rada sudije i tužiocu su dužni rukovodiocu pravosudne institucije podnijeti izvještaj u kojem će navesti razloge koji su zahtijevali njihov prekovremeni rad, rad u neradni dan, noćni rad ili rad na dan državnog praznika i vrijeme provedeno na radu.

Član 4

(Isplata naknade za pripravnost)

U skladu s odlukom kojom se određuje pripravnost sudija, odnosno tužilaca, rukovodilac pravosudne institucije donosi posebnu odluku o isplati naknade za pripravnost sudijama, odnosno tužiocima koji su ostvarili pravo na naknadu u smislu odredbi člana 1 ovog pravilnika.

Član 5

**(Utvrđivanje naknade za prekovremeni rad, rad u
neradne dane, noćni rad i
rad u dane državnih praznika)**

Rukovodilac pravosudne institucije početkom svakog mjeseca donosi posebnu odluku kojom utvrđuje broj slobodnih dana koji sudiji, odnosno tužiocu pripadaju na osnovu prekovremenog rada, rada u neradne dane, noćnog rada i rada u dane državnih praznika, uzimajući u obzir izvještaje iz člana 2 stava 4 ovog pravilnika.

Član 6

(Stupanje na snagu)

Ovaj pravilnik stupa na snagu 1. 1. 2020. godine, a objavit će se u Službenom glasniku Brčko distrikta Bosne i Hercegovine.

Broj: SuPK-03-2192/19
Brčko, 20. 12. 2019. godine

**PREDSJEDNIK
PRAVOSUDNE KOMISIJE**
Safet Pizović, s. r.

56

Na osnovu odredbi članova 4. i 18. Pravilnika o postupku upravljanja privremeno oduzetom imovinom (Službeni glasnik Brčko distrikta Bosne i Hercegovine, broj 33/19), sekretar Pravosudne komisije Brčko distrikta Bosne i Hercegovine dana 16. 1. 2020. godine donosi

**UPUTSTVO
O USPOSTAVI, VRSTI I SADRŽAJU EVIDENCIJA O
UPRAVLJANJU I RASPOLAGANJU PRIVREMENO
ODUZETOM IMOVINOM**